

KOLOSI

¹ E Pol. Kristus Yesus na e qarınbej deqa e aqa anjam mare mare laqnum. Qotei aqa segi areqalo na e wau di ebej. ² Aqo gago was Timoti wo anjam endi nenğrenyosim nunğoq qarınyonum. Niņgi gago Kristen was bole. Niņgi Qotei aqa segi tamo unğasari Kolosi qureq di unub qaji. Niņgi Kristus qa nunğo areqalo siņgilateqnub. Gago Abu Qotei a niņgi qa are boleiyimqa niņgi lawo na soqniy.

Kolosi Kristen nanđi Yesus qa nanđo areqalo siņgilateb

³ Aqo Timoti wo gaigai niņgi qa pailyoqnsimqa gago Tamo Koba Yesus Kristus aqa Abu Qotei biņiyeqnum. ⁴ Aqo aiyel niņgi qa anjam bei endegsi quem. Niņgi Kristus Yesus qa nunğo areqalo siņgilatoqnsib Qotei aqa segi tamo unğasari kalil nanđi qalaqalainjreqnub. ⁵⁻⁶ Nami Yesus aqa anjam bole nunğoq bonaqa niņgi queb. Qusibqa bini iņgi bole bole Qotei na laņ goge dia gereiyetņgej qaji di niņgi oqajqa tariņeqnub. Yesus aqa anjam bole di sawa sawa kalilq gileqnaqa tamo unğasari gargekoba nanđi quoqnsib nanđo areqaloq di siņgilatoqnsib kumbra bole bole yeqnub. Niņgi dego kumbra bole bole yeqnub. Qotei a iga qa are boleiyej anjam bole di niņgi qusib poiņgonaqa bati deqa niņgi kumbra bole yqajqa utru ateb. ⁷ Anjam di Epafra a niņgi mernğonaq qusib poiņgej. Epafra a iga ti Kristus aqa wau

tamo bole unum. Iga Epafras tulan qalaqalaiyeqnum. A singila na ningi aqaryaingoqnsiqa Kristus aqa wau ojeqnu. ⁸ A ningi qa endegsi iga saigej, “Qotei aqa Mondor na Kolosi Kristen nanngi singilatnjreqnaqa nanngi qalaqalaiyo kumbra dau-ryeqnub.”

Pol a gaigai Kolosi Kristen nanngi qa Qotei pailyeqnu

⁹ Iga nami quem, ningi kumbra bole di yeqnu. Bati deqa iga ningi qa pailyqa utru atem. Bini iga gaigai ningi qa pailyoqnsim unum. Iga endegsi pailyeqnum, “O Abu, ni na Kolosi Kristen nanngi aqaryainjrimqa nanngi ino areqalo geregere poinjrqas. Amqa ino Mondor na nanngi powo koba enjroqnmqa nanngi ino anjam kalil bole qalieoqngab. ¹⁰ Osib nanngi kumbra kalil Tamo Koba a tulan areareteqnu qaji di yoqnsib walweloqngab. O Qotei, ni na nanngi aqaryainjroqnmqa nanngi wau bole bole yoqnsib ni qa geregere qalieoqnb nanngo qalie di tulan kobaoqngas. ¹¹ Ni ino segi singila kobaquja na nanngi singilatnjroqnm nanngi gulbe kalil qoboiyoqngab. Osib lawo na sosib tulan areboleboleinjroqngas.” ¹² O ijo was, iga degsim ningi qa Abu pailyeqnum. Deqa ningi a binjyoqnsib soqniy. A na ningi keretngej deqa ingi bole bole a nami lan goge dia gereiyetngej qaji di ningi mondon oqsib oqab. Agi ningi ti Qotei aqa segi tamo ungasari kalil suwanjoq di unub qaji nanngi ti ingi di oqab. ¹³ Nami iga ambruq di soqnem. Ambru aqa singila dena iga taqatgesoqnej. Onaqa bunuqna Qotei na iga ambruq dena elenosiqa aqa segi Niri qujai tulan qalaqalaiyeqnu qaji aqa sorgomq di

iga atej unum. Deqa bini Yesus a gago Mandor Koba sosisiq iga taqatgeqnu. ¹⁴ A na iga awaigosiq a gago une kobotetgej.

Pol a Yesus aqa kumbra ti wau ti deqa anjam saej

¹⁵ Yesus a segi Qotei. Gago namdamu na iga Qotei unqa keresai. Ingi ingi kalil Qotei na gereinjrej qaji di Yesus a segi utru. ¹⁶ Yesus aqa wau na Qotei na ingi ingi kalil lan ti mandam ti di unub qaji di gereinjrej. Ingi ingi kalil gago namdamu na uneqnum qaji ti gago namdamu na unqa keresai qaji ti di Yesus aqa wau na Qotei na gereinjrej. Lan goge qaji singila ti lan angro nanqi ti mandor kokba ti mondor nanqi ti kalil di Yesus aqa wau na Qotei na gereinjrej unub. Ingi ingi kalil di Yesus a segi utru. Di aqa segi ingi ingi. ¹⁷ Tulan nami ingi ingi kalil di brantosaisonaqa Yesus a soqnej. A na ingi ingi kalil di geregere taqateqnu deqa ingi ingi kalil degsi bole unub. ¹⁸ Yesus a Kristen tamo ungasari nanjo gate. Nanqi aqa jejamu bul. A nanjo nambile qa utru. A tamo kalil nanqi qa namoosiq subq na tigelej deqa a segi qujai ingi ingi kalil nanjo gate. ¹⁹ Qotei aqa are koba endegsi unu. Aqa segi nambile ti kumbra ti kalil aqa Niri Yesus aqaq di soqnim Qotei a segi Yesus aqaq di keretosim maqesqas. ²⁰ Osim a Yesus aqa wau na ingi ingi kalil mandam ti lan ti di unub qaji nanqi tingitnjrimqa nanqi a ombla geregere lawo na sqab. Aqa are koba degsi unu deqa a na Yesus qarinyonaqa a namburbasq di moinaqa aqa len aiyej qaji dena a jeu kobotosiqa iga olo elenej.

²¹ Nami ningi Yesus qa isaq di soqneb. Ningi nunjo segi areqalo na laqnsibqa Qotei ti jeu ato-

qnsib kumbra uge uge yoqneb. ²² Ariya bunuqna Yesus a namburbasq di moiyej aqa kumbra dena Qotei na jeu kobotosiqa ningi olo elenej. A degyej. Di kiyaga? A na ningi metngim ningi aqa areq bosib aqa segi kumbra boleq di sosib aqa n̄amgalaq di tamo bole une saiqoji sqajqa deqa. ²³ Deqa ijo was kalil, une bei na ningi titngwa laqnimqa Yesus aqa anjam bole ningi queb qaji di nungo areqaloq di olo singilatoqniy. Di urataib. Ningi ingi bole bole Qotei a nami ningi engwa marej qaji di oqajqa tariñoqniy. Osib singila na tigelesoqniy. E Pol. E Qotei aqa wau tamo. E na Yesus aqa anjam bole di tamo ungasari kalil mandamq endi unub qaji nan̄gi minjre minjre laqnum.

Pol a Kolosi Kristen nan̄gi aqaryainjrqa marsiq jaqatin̄ koba eqnu

²⁴ Kristus aqa tamo ungasari nan̄gi aqa segi jeku jamu bul. A na nan̄gi aqaryainjrqa marsiq jaqatin̄ koba ej. Aqa jaqatin̄ di koboosaiunu deqa e dego nan̄gi qa ti ningi qa ti osimqa ijo segi jekamuq di jaqatin̄ koba eqnum. Ijo kumbra dena e na Kristus aqa jaqatin̄ kereteqnum. E ijo jaqatin̄ deqa tulan areboleboleibeqnu. ²⁵ Qotei a segi na e giltbej deqa e Kristus aqa tamo ungasari nan̄gi qa waueqnum. Ijo wau agiende. E Qotei aqa anjam kalil mare mare laqnum. Di ningi aqaryain̄gwajqa deqa. ²⁶ Tulan nami Qotei aqa anjam di uliesoqnej. Deqa tamo ungasari kalil nan̄gi aqa anjam di qalieosaisoqneb. Uliesosiq bosi bosiq ariya bini Qotei na aqa anjam di olo boleq ateqnaqa aqa segi tamo ungasari nan̄gi quoqnsib poinjreqnu. ²⁷ Qotei aqa segi areqalo na uli anjam di boleq atoqnsiqa

iga osorgeqnu. Deqa iga endegsi poigeqnu, bole, Qotei na sawa bei bei qaji nanği aqaryainjreqnu. Uli anjam di tulan bolequja. Aqa damu agiende. Kristus a nungo ambleq di unu. Mondoŋ a na niŋgi eleŋosim laŋ qureq joqsi oqimqa dia niŋgi iŋgi tulan bole bole oqab. Niŋgi iŋgi di oqajqa tariŋoqnsib unub. ²⁸ Iga na tamo unğasari kalil nanği Kristus aqa anjam minjreqnum. Iga powo bole ti sosim anjam di siŋgila na minjreqnum. Iga degyeqnum. Di kiyafa? Nanği gago anjam di qusib Kristus aqa kumbra torei dauryekritosib soqrib iga na nanği joqsim Qotei aqa areq di atqajqa deqa. ²⁹ E deqa wau koba yeqnum. Kristus aqa siŋgila kobaquja Qotei na ebej qaji dena e wau koba yoqnsim laqnum.

2

Niŋgi gisaŋ anjam dauryaib

¹ O ijo was, niŋgi endegsib qalieoiy. E niŋgi qa ti Kristen tamo unğasari Laodisia qureq di unub qaji nanği qa ti tamo unğasari kalil ijo ulatamu unosaieqnu qaji nanği qa ti wau koba yeqnum. ² E niŋgi kalil are siŋgilatetŋgitqa niŋgi segi segi qa qalaqalaiyo kumbra yoqnsib are qujaitosib sqajqa deqa osim wau koba yeqnum. Ijo are koba endegsi unu. Niŋgi powo bole osib Kristus qa nungo areqalo torei siŋgilaboletosib dena niŋgi Qotei aqa uli anjam geregere qalieqab. Kristus a segi uli anjam di aqa utru. ³ Qalie ti powo ti kalil aqaq di uliejunu.

⁴ E niŋgi anjam degsi merngonum. Di kiyaaqa? Tamo bei na bosim niŋgi gisaŋgosim walawala anjam bei merngimqa niŋgi qusib dauryaib deqa. ⁵ E bini niŋgi koba na sosai. E isaq endi unum. Ariya niŋgi ijo are miligiq di unub deqa e niŋgi ti sobulejunum. E qalieonum, niŋgi wau bole yoqnsib nuŋgo areqalo Kristus qa geregere siŋgilatoqnsib unub. Deqa e niŋgi qa tulaŋ areboleboleibeqnu.

Iga Kristus taqyosim nambile bole oqom

⁶ Niŋgi nami Tamo Koba Kristus Yesus osib nuŋgo areq di ateb deqa niŋgi aqa kumbra na walweloqniy. ⁷ Mandam na nŋam jirim ojesonaqa nŋam a siŋgila na tigelejunu dego kere niŋgi Yesus osib nuŋgo are miligiq di siŋgilatosib aqa kumbra dauryoqniy. Yesus aqa anjam bole iga na merngoqnem qaji di niŋgi bati gaigai nuŋgo areqaloq di siŋgilatosib soqniy. Osib niŋgi gaigai Qotei biŋjiyoqniy.

⁸ O was niŋgi geregere nŋam atoqniy. Tamo qudei na bosib niŋgi naŋgo anjam dauryqajqa walawalaingwab. Naŋgi naŋgo segi powo na ti gisaŋ anjam na ti niŋgi walawalaingwab. Deqa niŋgi naŋgo anjam di dauryaib. Tamo naŋgi di naŋgo moma naŋgo anjam dauryeqnub. Osib mondor uge uge laŋ ti mandam ti taqatejunub qaji naŋgo anjam dego dauryeqnub. Naŋgi Kristus aqa anjam dauryosaieqnub.

⁹ Niŋgi qalie, Kristus a tamo bulyosiq gago ambleq di soqnej. Qotei aqa segi nambile ti kumbra ti kalil Kristus aqaq di keretosiq maqejunu. ¹⁰ Ingi inŋi kalil siŋgila ti unub qaji naŋgo gate koba agi Kristus. Niŋgi Kristus aqa segi tamo

unğasari unub deqa Qotei na niŋgi ɲambile eŋgej. ɲambile di nuŋgoq di tulaŋ keretosiq maqejunu. ¹¹ Niŋgi Kristus taqyejunub deqa niŋgi muluŋ bole aiyejunub. Di jejamu qaji muluŋ sai. Niŋgi Kristus aqa kumbra na nuŋgo areqalo namij kalil urateb. Kumbra di muluŋ bole aqa utru. ¹² Niŋgi yanso eb bati deqa niŋgi Kristus beteryosib a ti moiyoqneleb. Onaqa Qotei na niŋgi Kristus ombla subq atobulej. Qotei na Kristus olo subq na tigeltetj bati deqa a na niŋgi Kristus ombla subq na tigeltɲobulej. Di kiyaaqa? Niŋgi Kristus qa nuŋgo areqalo siŋgilateb deqa. ¹³ Nami niŋgi une yoqnsib laqnsib nuŋgo areqalo namij dauryoqneleb. Dena niŋgi moreɲesobuleb. Onaqa Qotei na niŋgi olo Kristus koba na ɲambile eŋgsiqa nuŋgo une kalil kobotetɲgej. ¹⁴ Nami dal anjam a gago une kalil boleq atsiq iga jeutgej deqa iga dal anjam aqa sorgomq di soqnem. Sonamqa Qotei na olo dal anjam mutu kalil di taqal waiyosiqa dal anjam aqa siŋgila kobotosiqa Kristus aqa ɲamburbaq di qamej. ¹⁵ Kumbra dena Qotei na mondor uge uge naŋgi ti naŋgo gate kokba ti kalil naŋgo siŋgila kobotetɲrej. Osiqa qoto siŋgilaosiqa naŋgi kalil tulaŋ buɲɲrej. Kristus a ɲamburbaq di moiyej wau dena Qotei a qoto siŋgilaonaq tamo unğasari kalil naŋgi unekriteb.

Niŋgi Kristus koba na moreɲobuleb deqa niŋgi dal anjam aqa sorgomq di sosai

¹⁶ Deqa tamo bei na nuŋgo jejamuq di anjam qametɲgosim endegsi mernɲgaiq, “Niŋgi iŋgi uyo ti ya uyo ti yori bati ti bai qala bunuj ti getentoqniy.”

¹⁷ O ijo was, kumbra deqaji seŋ qunuŋ bul damu

saiqoji. Kumbra dena ingi bole bole mondon brantqas qaji di iga lanja suwi osorgeqnu. Ariya Kristus a segi ingi bole bole deqa utru. ¹⁸ Tamo qudei na ningi endegsib merngwab, “Ningi nungo segi ñam aguq atoqnsib olo lan angro nangi qa louoqniy. Iga ñeiobilqei na kumbra di unem deqa ningi degyiy.” O ijo was, ningi tamo di nanngo anjam quetnjraib. Tamo deqaji nangi nanngo segi areqalo namij dauryeqnub. Osib mareqnub, “Iga powo bole ti unum.” ¹⁹ Tamo deqaji nangi Kristus beteryosaieqnub. Kristus a gago gate. Iga aqa jejamu qujai. Iga aqa singa ti ban ti bul. A na iga singilatgeqnu deqa iga kalil jejamu qujaiq di turtobuloqnsim Qotei aqa wau na boleqnsim singilaeqnum.

²⁰ Ningi Kristus koba na moreñobuleb deqa ningi mondor uge uge lan ti mandam ti taqatejunub qaji nanngo sorgomq di sosai. Deqa kiyaaqa ningi olo mandam tamo nanngo kumbra dauryeqnub? Kiyaaqa ningi nanngo dal anjam dego dauryeqnub? ²¹ Nanngo dal anjam agiende, “Ni ingi di ojaim. Ni ingi di uyaim. Ingi di ino jejamuq di betermaiq.” O ijo was, ningi kiyaaqa dal anjam di dauryeqnub? ²² Dal anjam di jejamu qa ingi ingi qa anjam. Iga jejamu qa ingi ingi qa are qaloqnqom di iga padalqom. Ingi ingi di urur koboqab. Dal anjam deqaji mandam tamo nangi na babteqnub. ²³ Bole, iga endegsi unobuleqnum. Dal anjam dena tamo qudei nanngo are tigeltetnjreqnaqa nangi louoqnsib nanngo segi ñam aguq atoqnsib nanngo jejamu qaloqnsib singilateqnub. Deqa nangi are qaleqnub, dal anjam dena powo bole babteqnu. Di sai. Ningi

quiy. Dal anjam dena iga aqaryaigwa keresai. Iga dal anjam di dauryqom dena iga gago segi areqalo namij uratqa keresai bole sai.

3

Kristus a gago nambile qa utru

¹⁻² O ijo was, Qotei a ningi Kristus ombla subq na tigeltngobulej deqa ningi lan goge qaji ingi ingi oqajqa wauoqniy. Kristus a lan goge oqsiq Qotei aqa ban woq di awejunu deqa ningi gaigai lan goge qaji ingi ingi oqajqa are qaloqniy. Ningi mandam qaji ingi ingi qa are koba qaloqnaib. ³ Ningi morenjobulosib olo nambile eb. Nungo nambile di agi Kristus aqaq di uliesonaqa ningi Qotei beterye-junub. ⁴ Kristus a nungo nambile qa utru. Mondon a boleq dimqa ningi dego a koba na Qotei aqa rian ti wala ti boleq dqab.

Ningi kumbra uge kalil uratekritiy

⁵ Deqa ningi mandam qaji kumbra kalil nungo are miligiq di unu qaji di moiyyotiy. Mandam qaji kumbra agi ubtosiy merngwai. Sambala kumbra ti, kumbra jiga ti, kumbra uge uge yqajqa are prugngoqa, mandam qa ingi ingi qa maulngoqa di kalil moiyyotiy. Mamaul kumbra di gisan qotei qa louo bul. ⁶ Tamo nanngi kumbra deqaji yeqnub qaji nanngi mondon Qotei na awai uge enjrsim nanngi qa minjin oqetqas. Tamo nanngi di Qotei aqa anjam gotranjo qaji tamo. ⁷ O ijo was, nami ningi dego tamo deqaji nanngi koba na laqnsibqa kumbra di yoqneb.

⁸ Ariya bini ningi kumbra kalil di uratekritiy. Nirin ti minjin ti are uge ti yomu anjam ti anjam

jiga ti di kalil uratekritiy. ⁹ Niŋgi nuŋgo areqalo namij aqa kumbra uge kalil qoreiyeb deqa niŋgi olo nuŋgo Kristen was naŋgi gisaŋ anjam minjroqnaib. ¹⁰ Niŋgi so bunujq di unub. Qotei a segi na nuŋgo so bunuj di gereiyetŋej. Osiqa a na gaigai niŋgi powo bole eŋgeqnu. A na niŋgi a bul sqa marsiqa nuŋgo so bunuj di gereiyetŋej. ¹¹ Iga so bunujq di unum deqa iga kalil kerekere unum. Deqa iga endegsi marqasai, “E Grik qaji” o “E Juda qaji” o “E muluŋ aiyo qaji” o “E muluŋ aiyosai qaji” o “E yaun tamo” o “E yambaŋ tamo” o “E kaŋgal tamo” o “E kaŋgal tamo sai.” Iga degsi marqasai. Di kiyaaqa? Kristus a gago kalil qa Tamo Koba. A segi qujai na iga keretgejunu.

Niŋgi nuŋgo Kristen was naŋgi qa duloqniy

¹² Qotei a niŋgi aqa segi qa marsiq giltŋej deqa a na niŋgi tulaŋ qalaqalaingeqnu. Deqa niŋgi kumbra endegyoqniy. Niŋgi nuŋgo Kristen was naŋgi qa duloqnsib kumbra bole bole enjroqniy. Osib niŋgi nuŋgo segi ñam aguq atoqnsib tamo naŋgi lawo na gereinjroqniy. Tamo qudei na niŋgi une bei eŋgibqa niŋgi kamba olo naŋgi qa urur minjin oqaiq. ¹³ Kristen tamo bei na niŋgi gulbe eŋgimqa uŋgum gulbe di qoboiyosib aqa une kobotetiy. Niŋgi degiy. Di kiyaaqa? Tamo Koba a na nuŋgo une kobotetŋej deqa. ¹⁴ Niŋgi qalaqalaiyo kumbra yoqniy. Qalaqalaiyo kumbra na kumbra kalil tulaŋ buŋjreqnu. Deqa niŋgi kalil koba na areqalo qujaitosib nuŋgo Kristen was naŋgi qalaqalainjroqniy. ¹⁵ Kristus a na iga lawo kumbra egeqnu deqa kumbra dena nuŋgo are miligi taqatesoqneme. Qotei na niŋgi metŋej deqa niŋgi jejamu qujai

bul sosib Qotei binjiyoqniy. ¹⁶ Osib ningi Kristus aqa anjam nungo are miligiq di singilatib soqnem. Soqnim ningi na nungo Kristen was nanngi areqalo bole ti powo ti osornjroqniy. Ningi nungo are miligiq di Qotei binjiyoqnsib a qa louoqniy. Lou qudei nenngrenq di unu qaji dena ti lou qudei Qotei aqa Mondor na nungo are miligiq di tigelteqnu qaji dena ti ningi Qotei qa louoqniy. ¹⁷ Nungo anjam maro na ti nungo wau na ti nungo kumbra kalil na ti ningi Tamo Koba Yesus aqa ñam soqtoqniy. Osib ningi aqa ñam na Abu Qotei binjiyoqniy.

Pol a tamo ti unja ti angro ti nanngi anjam minjrej

¹⁸ O ungasari, ningi nungo tamo nango sorgomq di soqniy. Ningi degyqab di Tamo Koba a ningi qa tulan areboleboleiyqas. ¹⁹ O tamo, ningi nungo ñaun nanngi tulan qalaqalainjroqniy. Ningi nango are ugetetnjraib.

²⁰ O angro, ningi gaigai nungo ai abu nango anjam dauryoqniy. Ningi degyqab di Tamo Koba a ningi qa tulan areboleboleiyqas. ²¹ O abu, ningi na nungo angro nango are ugetetnjraib. Ningi nango are ugetetnjrqab di nanngi are gulbeinjrqas. Osim nanngi wau bole yqajqa asginjrqas.

Pol a kanngal tamo nango wau qa gate nanngi ti anjam minjrej

²² O kanngal tamo, ningi gaigai nungo wau qa gate nango anjam dauryoqniy. Ningi gisan na nango ñamdamuq di lanja wau bole yobulaib. Ningi Tamo Koba a qa ulaosib gaigai are bole na nungo wau qa gate nanngi qa wau bole yoqniy. ²³ Wau kalil ningi nanngi qa yeqnub qaji di ningi singila

na yoqniy. Niŋgi mandam tamo naŋgi qa wau-osaieqnuub. Niŋgi Tamo Koba a qa waueqnuub. ²⁴ Niŋgi qalie, mondoŋ Tamo Koba a na niŋgi awai boledamu enqwas. Awai di a nami aqa segi tamo uŋgasari naŋgi enjrqa marej. Niŋgi are qaliy. Niŋgi Tamo Koba Kristus aqa kaŋgal tamo unub. A segi nuŋgo Wau qa Gate. ²⁵ Tamo uŋgasari une ate-qnuub qaji naŋgi Qotei na kamba awai uge enjrqas. Aqa ŋamgalaq di tamo uŋgasari kalil naŋgi kerekere unub deqa a kumbra qujai na naŋgi peginjrqas.

4

¹ O wau qa gate, niŋgi nuŋgo kaŋgal tamo naŋgi kumbra bole enjroqniy. Niŋgi qalie, nuŋgo Gate dego unu. Agi a laŋ qureq di unu.

Niŋgi gaigai siŋgila na Qotei pailyoqniy

² Ariya ijo was, niŋgi gaigai siŋgila na Qotei pailyoqniy. Niŋgi aqarataib. Niŋgi pailyoqnsib areqalo bole ti sosib Qotei binjiyoqniy. ³ Niŋgi iga qa dego Qotei pailyoqniy. Niŋgi endegsib pailyoqniy, “O Abu, ni na Pol aqa wau qujai naŋgi ti gam waqtetnjroqnimqa naŋgi medabu waqto-qnsib Kristus aqa anjam nami uliesoqnej qaji di mare mare laqŋqab.” O ijo was niŋgi quiy. Jeu tamo naŋgi Kristus aqa anjam di dauryqa asgin-jreqnu deqa naŋgi e ojsib tonto talq endi waibeb unum. ⁴ Deqa niŋgi e qa endegsib pailyoqniy, “O Abu, ni na Pol aqa medabu siŋgilatetimqa a ino areqalo dauryoqnsim Kristus aqa anjam geregere palontoqŋqas.”

⁵ O ijo was, niŋgi areqalo bole dauryoqnsib tamo uŋgasari Yesus qaliesai qaji naŋgo ambleq

di kumbra bole bole yoqniy. Bati soqnim ningi Kristus aqa kumbra nanngi osornjroqniy. ⁶ Ningi tamo ungasari nanngo are boletetnjrqa oqnsib anjam bole segi gaigai minjroqniy. Tamo qudei na ningi anjam bei nenemngibqa ningi kamba anjam kiyersib minjrqa oqnsib gegerere are qaloqnsib minjroqniy.

Pol a Tikikus Onesimus wo qarinyrnaq nanngi Kristen nanngoq gileb

⁷ E na Tikikus qarinyonum nunngoq bqo. A ijo wau kalil qa ningi saingwas. Tikikus a gago wau qujai. A gago Kristen was bole. A Tamo Koba aqa wau tamo bolequja. ⁸ E na a qarinyonum nunngoq bqo. Iga kiyersim unum di a na ningi saingim qusib dena nunngo are singilatqab. ⁹ E na Onesimus dego qarinyonum a Tikikus ombla nunngoq bonub. A dego gago Kristen was bole. A nunngo len qujai. Nanngi aiyele nunngoq bosib gago kumbra kalil qa ningi saingwab.

Pol na Kolosi Kristen nanngi kaiyeinjrej

¹⁰ Aqo Aristarkus wo ombla tonto talq endi waigeb unum. Aristarkus a na ningi kaiyeingwo. Mak a Barnabas aqa gagai. A dego ningi kaiyeingwo. Mak a nunngoq bo degamqa ningi a osib gegerereiyiy. Agi e nami a qa anjam nenngrenyosim nunngoq qarinyem. ¹¹ Jastus a dego ningi kaiyeingwo. Aqa ñam bei Yesus. A Tamo Koba Yesus aqa wa. Nanngi qalub Juda tamo. Juda tamo qudei nanngi e ombla Qotei aqa wau ojosaieqnu. Nanngi segi qalub e ombla Qotei aqa wau ojeqnum. Qotei na aqa segi tamo ungasari nanngi taqatnjrsim nanngo Mandor Koba sqas anjam di nanngi segi

qalub e aqaryaiboqnsib mare mare laqnu. Juda tamo bei na degyosaieqnu.

¹² Epafra a dego ningi kaiyeingwo. A nungo len qujai. A Kristus Yesus aqa wau tamo. A gaigai singila na ningi qa endegsi pailyeqnu, “O Qotei, ni na Kolosi Kristen nanngi aqaryainjrimqa nanngi singila na tigeloqnsib ino kumbra bole kalil kere-toqnsib ino areqalo geregere qalieqab.” Epafra a ningi qa degsi pailyeqnu. ¹³ O ijo was, e ningi endegsi merngwai. Epafra a gaigai ningi qa are qaloqnsiq deqa a wau koba yeqnu. A ningi qa ti Laodisia Kristen nanngi qa ti Hierapolis Kristen nanngi qa ti are qaloqnsiq deqa wau koba yeqnu. ¹⁴ Ariya Luk a dego ningi kaiyeingwo. A yu qangra tamo. Iga a tulan qalaqalaiyeqnum. Demas a dego ningi kaiyeingwo.

¹⁵ O was ningi ijo kaiye anjam endi osib Laodisia Kristen nanngi dego minjriy. Osib Kristen tamo ungasari Nimfa aqa talq di korooqnsib loueqnub qaji nanngi a ti ijo kaiye anjam endi osib nanngi minjriy. ¹⁶ Ningi ijo anjam kalil e nengrenyonum qaji endi sisiyosib koboamqa qarinyib Laodisia Kristen nanngoq gilimqa nanngi dego sisiyqab. E anjam bei dego nami nengrenyosim Laodisia Kristen nanngoq qarinyem. Ijo anjam di nanngi na kamba olo nungoq qarinyib ningi sisiyoiy. ¹⁷ Ariya ningi na Arkipus endegsib minjiy, “Qotei a ni wau emej deqa wau di ni na geregere taqatosim wauoqne.”

¹⁸ E Pol. Ijo anjam bosiq endi koboqo. Deqa e ijo segi ban na kaiye anjam endi nengrenyosim nungoq qarinyonum. E tonto talq endi unum deqa ningi e uratbaib. Ningi e qa are qaloqnsib soqniy. O ijo

was, Qotei a niŋgi qa are boleiyeme. Bole.

Yesus Aqa Anjam Bole 2014
The New Testament in the Anjam language of Papua
New Guinea, 2014 revision
Nupela Testamen long tokples Anjam long Niugini, 2014
copyright © 2014 Wycliffe Bible Translators, Inc.

Language: Anjam

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-04-28

PDF generated using Haiola and XeLaTeX on 3 Mar 2023 from source files dated 9 Oct 2020

0eb339dc-c20a-5065-9483-338933d97585